



23. juli 2021

Inatsisartut ingerlatsinermut maleruagassaasa § 37 imm. 1 tunngavigalugu Naalackersuisunut ukuningga apeqquteqaateqarpunga:

Naalackersuisunut apeqquteqaatit:

1. Juulip qaammataani tammajuitsussarsiortitsilluni piniartitsinermut periarfissiineq sooq Naalackersuisut unitsippaat?

a. Sooq 2024-ip tungaanut taamaaliorniarluni qinerneqarpa?

2. Taamatut aaliangernermi namminersorlutik sullissisut isertitassaraluatik qassit annaassavaat?

3. Taamatut aaliangernermi namminersorlutik inuussutissarsiortut qanoq eqqugaassappat?

4. Naalackersuisut aaliangernerminnut atasumik taarsiissuteqarnialikkersaarpat?

5. Tassanngaannartumik aaliangernermit sooq tusarniaaneq 1. juni-miit 2. juli-muinnaq ingerlanneqarpa?

6. Qeqqata Kommuniani namminersorlutik inuussutissarsiutillit qassit aaliangernermit eqqorneqarpat. Kommuneni allani sullissisunik allanik eqqugaasoqarpa?

7. Tammajuitsussarsiortitsilluni piniartitsinermut sulialinnut isertitassat annertunersaasa ilanngarniarneqarneranni, illuatungaani iliuseqarnissamut sumik eqqarsartoqarpa?

8. Tusarniaanerup sivikitsup saniatigut Arctic Circle Business aaliangernermit peqataatinneqarsimava?

9. Eqqartukkamut tunngasunik allanik soqutiginaatilinnik Naalackersuisut paasissutissiisinnaappat?

(Inatsisartunut ilaasortaq Jens-Frederik Nielsen, Demokraatit)

Tunngavilersuut

Ukiuni arlalinni sullissisut namminersortut tammajuitsussarsiortitsilluni piniartitsisinnaaneq piviusunngortinniarsimavaat. Namminersorluni inuussutissarsiortutut aallarlerlaatut suliffeqarfiup aallartinniarnani amerlasuunik annertuunillu nalorninarloqarsinnaasarpog. Amerlasuut suna tamaat pilliutigalugu, ulloq unnuarlu sulillutik iluatsinnissaata tungaanut. Tamanna sullissisunut amerlasuunut piviusuuvog. Qujassutissaqarfigeqaagut. Nunap immikkoortortaaanniinaq pinnani nunali tamakkerlugu siuarsaanermut suliffissaqarniarnemullu.

Tammajuitsussarsiortitsilluni piniartitsisinnaaneq Kalaallit Nunaannut ussassaarutaavog pingaartog. Takornariartitsinitsinnut pingaartutut inissisimavog nunarsuarmilu tamani siuariartortuulluni. Pingaartuuvog takornariartifigineqartartutut misigisassanik amerlasuunik pingaartumillu



piniartitsisinnaanermik neqerooruteqarsinnaanerput, takornarissat taamatut takornariartariaatsimi aningaasarpassuarnik nunatsinnut tunioraasarmata.

Naalackersuisut sivikitsuinnarmik tusarniaanermikkut namminersorlutik inuussutissarsiortut pinngitsaalillugillusooq aaliangertussangortippaat. Piniariarlutik takornarissat piffissaq sivisoorujussuaq sioqqullugu pilersaaruserlutillu akiliisarput, taamaattumik aaliangerneq ajoqutaalluinnarlunilu pissusissamisuunngilluinnarpoq.

Sullissisut maanna ima inissipput takornarianut ukiuni arlalinni sullinneqarnerminnut akileereersimasunut aningaasanik utertitsisariaqalerlutik. Ernummatigineqarpoq Naalackersuisut inuussutissarsiut ukiorpassuarni siuarsarneqartoq ineriartortorlu unitsinniaannaraat, allanik qinigassaqartitsinatik.

Apeqqutima ullut suliffiusut qulit iluanni akineqarnissaat kissaatigaara.